

Nunatta Karsiata 2008-mut naatsorsuutaasa akuerineqarnissaat aamma 2009-mut naatsorsuutit kukkunerisiorneqarnissaannut kukkunerisiuisartumik naalagaaffimmit akuerisaasumik toqqaanissaq pillugu inatsisartunut inassuteqaat pillugit aalajangiiffigisassatut siunnersuut

(Inatsisartut Kukkunerisiuinnermut Ataatsimiititaliaat)

Akissuteqaat

(Aningaasaqarnermut Naalakkersuisoq)

Aappassaanneerpeqarnera

Inatsisartut ukiakkut ataatsimiinneranni siusinnerusukkut Nunatta Karsiata 2008-mut naatsorsuutai saqqummiunneqarput. Kukkunerisiuinnermut Ataatsimiititaliaq Nunatta Karsiata naatsorsuutaasa akuerineqarnissaannut isumaliutissiissutiliorsimavoq.

Kukkunerisiuinnermut Ataatsimiititaliaq isumaqatigiittup Inatsisartunut inassutigaa Nunatta Karsiata 2008-mut naatsorsuutai akuersissutigineqassasut. Suliat Kukkunerisiuinnermut Ataatsimiititaliaq isumaliutissiissummini uparuartarsimasai nassuiaateqarfigissavakka. Tamatuma saniatigut Naalakkersuisunut ilaasortat allat apeqqutit nammineq suliassaqarfimminiittut akissuteqarfigisarnissaannut piareersimassapput.

Naatsorsuutit saqqummiunneqarnissaannut piffissaliussaq

Kukkunerisiuinnermut Ataatsimiititaliaq allappoq Naalakkersuisut kingusinaarsinnaanernut sillimanerusariaqartut, tassa naatsorsuutunik siullermeerinnerit Inatsisartut upernaakkut katersuunnerini pisinnaangorlugit. Naalakkersuisut oqaatigissavaat naatsorsuutit saqqummiunneqartarneranni missingersuutitut inatsimmi malittarisassat naatsorsuutit tunniunneqartarnerannut piffissaliussanut tunngasut malinneqartarmata, kisianni soorunalimi ukiumoortumik naatsorsuutit kukkunerisiorikkat sapinngisamik piaarnerpaamik naammassineqartarnissaat tunniunneqartarnissaallu annertuumik soqutigisaralugu.

Kukkunerisiuinnermut Ataatsimiititaliaq isornartorsiuinnermini oqaatigaa nunatta karsiata naatsorsuutaanik eqqortumik takussutissiinissamik piumasaqaammik malinnittunik pissarsiniarnermut nukissarpasuit atorineqartariaqarsimasut. Naalakkersuisut Inatsisartut inatsisaat malillugit akisussaaffitsik ilisimaaraat isumaqatigalugulumu naatsorsuutit inaarsarniarneqarnerat saniatigut suliassarpasuarunik nassataqartariaqanngimmat. Taakku tapertalerniarlugit nakkutilleeriaatsinik kiisalu suliat ingerlaartarfiinik ilanngussilluni suliqaarneq taamaammat suli ineriartortinneqarpoq atuleriartuaarneqarlunilu.

Apeqqusiineq

Kukkunersiuinermut Ataatsimiititaliap akueriuminaatsippaa Naalackersuisut, naak ukiumoortumik naatsorsuutit taama kingusitsigisukkut inaarsarneqaraluartut, kukkunersiuisartup kukkunersiuinermut oqaaseqaataani apeqqusiisimaneq pinngitsoortissinnaasimanngimmassuk. Ataatsimiititaliap naatsorsuutigaa Akileraartarnermut Aqutsisoqarfimmi ajornartorsiutit matuma kingornatigut taamatut pisoqarnissaanut tunngaviliisuussanngitsut.

Naalackersuisut siusinnerusukkut itisilerutaasunik akissuteqarnissaminnut periarfissaqarsimapput aamma ajornartorsiutit 2008-mut naatsorsuutini akileraarutinit isertitat naatsorsorneqarnerannut tunngatillugu apeqqusiinermut pissutaasimasut pillugit Kukkunersiuinermut Ataatsimiititaliamit isumasioqatigiinniarluni aggersaanerup akissuteqarfiginissaanut.

Naalackersuisut paasivaat Kukkunersiuinermut Ataatsimiititaliap paasilluarsimmagu 2009-mut naatsorsuutitut kukkunersiuisartut oqaaseqaataanni 2008-mut naatsorsuutinisulli taamatut apeqqusiisoqarnissaa naatsorsuutigisariaqartoq. Kisianni 2010-mut kingusinnerusumulluunniit naatsorsuutitut tunngatillugu taamatut pisoqaqqittariaqanngilaq.

Soorunalimi Naalackersuisut soqutigisaraat naatsorsuutit kukkunersiuisartunit isorineqarsimanatik saqqummiunneqartarnissaat. Taamaammut siunissamut tunngatillugu taamatut pisoqaqqinnginnissaa sulissutigineqarpoq. Siusinnerusukkut oqaatigeriikkattut suleriaatsit suliallu ingerlaartarnerisa taamatut ajornartorsiuteqalertoqarsinnaaneramik annikillisitsisut apeqqusiisoqarsinnaaneranillu annikillisitsisut atorneqalernissaat sulissutigineqarpoq.

Naatsorsuutitut tunngatillugu nassuiaatit

Kukkunersiuinermut Ataatsimiititaliap naatsorsuutitut tunngatillugu nassuiaatit immikkut soqutigineqarnerulernissaat kissaatigaa, taakkumi tamakkiisumik takussutissiisimanngitsutut isumaqarfigineqarmata. Naalackersuisut ukioq 2009-mut naatsorsuutitut periaatsit nutaat atorneqalersinniarpaat, naatsorsuutitut tunngatillugu nassuiaatinik assigiissaarisut, peqatigitillugulu taakkuninnga pitsaanerulersitsisut. Naalackersuisut 2010-mi upernaakkut tamakkununnga tunngatillugu suliat ingerlaartarnerisa allaaserineqarnerat Kukkunersiuinermut Ataatsimiititaliamut nassiuutissamaarpaat.

Kukkunersiuinermut Ataatsimiititaliap maluginiarsimavaa akiliisitsiniartarnermik periutsit tamatigoornerusariaqartut tamanullu sammititaallutik. Akiliisitsiniartarnermut oqartussaasut, Akileraartarnermut Aqutsisoqarfik kiisalu Aningaasaqarnermut Sulisoqarnermullu Aqutsisoqarfik tamakkununnga tunngasunik ullumikkut suleqatigiissuteqalerput. Tamakkununnga tunngasut pisariillisaavigineqarnissaannut periaatsinik nutaanik piviusunngortitsinissaq sulissutigineqarpoq, taamaalillutik pisortanut akiitsut suqaluartulluunniit sulissutigineqartunut ilanngunneqarsinnaanngorniassammata. Naalackersuisut tamakkununnga tunngatillugu paasissutissiisarnerunissamik siunnersuut paasilluarsinnaavaat.

IT

Ataatsimiititaliap paaserusuppaa Kikkut Namminersorlutik Oqartussanut qarasaasialerisuunersut aamma suliffeqarfii allaneersut taamatut IT-lerinerannut Namminersorlutik Oqartussat qanoq amerlatigisunik akiliuteqartarnersut. Nunarsuarmi ileqquuleriartorpoq IT-mik ingerlatsinerup allanut suliaakkiissutigisaleruuna, tassami IT-mik ingerlatsinerup allanut suliaakkiissutigineqartarnera ilaatigut akikinnerukkajuttarmat. Eqqortunik piginnaasallit pissarsiariniartarnerat taakkulu atorfeqaannarsinniartarnerat ajornakusoorput. Namminerisamik IT-mut immikkoortortaqaarnermiit IT-mik ingerlatsinerup allanut suliaakkiissutigineqartaleruuna Namminersorlutik Oqartussani ileqqaarutaalereerpoq.

Namminersorlutik Oqartussat sullissisartut Kalaallit Nunaanneersut nunarsuarmilu allaneersut maannakkut IT-mik suliassanut atugaraat. Qitiusumik allattoqarfimmi IT-mik ingerlatsinermut 2009-p naanissaata tungaanut Sermit A/S sullissisut pingaarnertut atorneqassaaq. Suliassat suliariumannittussarsiuunneqaaqqammerput tassanilu ajugaasuupput Inu:IT Kontorhuset A/S. Ukiuni 2010-miit 2012-mut tamatuma kingunerissavaa suli annertunerisunik ileqqaaruteqarneq, immaqalumi sullissinerup pitsaaneruleruuna, taamatullu Namminersorlutik Oqartussani IT-mut tunngatillugu isumannaanerulerneq.

Ataatsimiititaliap paaserusuppaattaq siunissaq ungasinnerusiq eqqarsaatigalugu Naalakkersuisut sunik pilersaaruteqarnerisut, IT-mut aningaasanik atuineq eqqarsaatigalugu oqaatigisimagamikku siunissami pisariillisaasoqarsinnaasoq.

IT-mut tunngassuteqartuni Naalakkersuisut kommuninik suleqateqarput, pisortat ataatsimoorullugu IT-mik aqutsisoqatigiivi aqutugalugit, taamaaliornikkut tamakkununga tunngasut ataatsimoorluni ineriartortinneqarniassammata, inuiaqatigiinnut tamanut iluaqutaasumik. Tassunga tunngatillugu ilaatigut maannakkut ingerlasoq ”Pitsaanerisumik innuttaasunik sullissineq” taaneqarsinnaavoq, Naalakkersuisut AIS 2010-p oqallisigineqarneranut atatillugu sukumiisumik ilisimatitsissutigisimasaat. Taamatuttaaq ataatsimoorluni aningaasaqarnermik aqutseriaasissaq nutaaq aamma ataatsimoorluni nalunaarsuiffeqalernissaq pillugit piareersaataasumik naliliisarluni misissuinerit aallartinneqassapput. 2010-mi nuna tamakkerlugu paasissutissiisarnermut attaveqatigiittarnermullu teknologiikkut iliuusissat soqutigisallit pisariaqartinneqartut suleqatigalugit aallartinneqassapput. Iliuusissat pilersaarutit imarissavaat IT-mut tunngassuteqartuni siunissamut pilersaarutit Kukkuersiuiinermut Ataatsimiititaliamit ujartorneqartut. Iliuusissat pillugit Naalakkersuisut Inatsisartut ilisimatitsissuteqarfigissavaat taakku saqqummerniariapata.

Kukkuersiuiinermut Ataatsimiititaliap paaserusuppaa Namminersorlutik Oqartussanit taakkulu ataanni suliffeqarfinit internetip paasissutissanik nuussisarnermut atorneqartarnera qanoq akeqartarnerisooq. Namminersorlutik Oqartussat, atuarfiit attaveqaataat ATTAT Peqqinnissaqarfillu paasissutissanik qarasaasiatigut ingerlatitseqqittarnernut ukiumut katillugit 20 mio. koruunit missarluinnaarnik maannakkut atugaqartarput.

Ataatsimiititaliattaq apeqqutigaa Tele-p akeqartitsinera assersuutigalugu suleqatigiinnernut qulaani taaneqartunut akornutaasinnaanersoq, tamakkunanimi annertuunik paasissutissanik nuussuisoqartarmat. Tamanna soqutiginarsilluinnarpoq imaatigut kaabilip atorneqalerneratigut. Maannakkut Namminersorlutik Oqartussat IT-kkut attaveqaataannik piareersaataasumik misissuinerit ingerlapput. Piareersaataasumik misissuinerit imarisussaassavaat attaveqaatit pitsaanerpaamik qanoq annertusarneqarnissaannut siunnersuut, tamakkulu Tele-p akeqartitsinerata aqqissuussaananeranut qanoq sanilliunneqarsinnaanersut. Tamatumani akeqartitsineq pillugu apeqqummi Tele akuliutsinneqassaaq. Piareersaataasumik misissuinerit 2010-mi naammasseriarpata taakku Naalakkersuisunit Kukkuersiuiinermut Ataatsimiititaliamut ilisimatitsissutitut nassiunneqarumaarput.

Kukkuersiuisartup ikiuulluni suliassai

Ataatsimiititaliap kissaatigaa Deloittep ineqarnerup aqqissuuteqqinneqarneranut atatillugu Naalakkersuisunut ikiuussimanera itisileriffiqineqassasoq, pingaartumik peqqinnissaqarfimmik immikkut misissusisoqarsimaneranut tunngatillugu. Naalakkersuisut Kukkuersiuiinermut Ataatsimiititaliaq tamakkuninnga ilisimatitsissuteqarfigereerpaat.

Inatsilerituut nassuiaateqarnerannut tunngatillugu Naalakkersuisut tamanna pillugu Kukkuersiuiinermut Ataatsimiititaliamut tanna saqqummeriarpat piaarnerpaamik ilisimatitsissummik nassiussaqaassapput.

Ataatsimiititaliap kissaatigaa paaserusullugu kukkuersiuiinermut nalunaarusiat Naalakkersuisut ataanni Namminersorlutik Oqartussani kukkuersiuisartunit suliarineqartartut sumut killinnersut. Kukkuersiuiinermut nalunaarusiat taaneqartut suliffeqarfimmi namminermi kukkuersiuisartunit suliarineqartut juunip qiteqqunnerani naalerneranilu 2009-mi kukkuersiuisartumut allaneersumut nassiunneqarsimapput.

Kukkuersiuiinermut Ataatsimiititaliap pissusissamisoorsorinngilaa peqqinnissaqarfik katillugit 48 mio. koruunik atuinerusimalluni piffissaagallartillugu Inatsisartunut pisariaqartinneqartunik naammattunillu paasissutissiisinnaasimangimmat. Naalakkersuisut missingersuutit missingersuutinillu malinnaasitsisarneq pillugit suliaq annertooq aallartippaat, siunissami taamatut pissusissamisuunngitsunik pisoqartannginnissaanut iluaqutaaniartussaq.

KNR aamma NBC-akiliutit

Kukkuersiuiinermut Ataatsimiititaliap kissaatigaa Nunap Karsianut tunngatillugu KNR-imut aningaasaliissutinik pisussaaffinillu paasissutinneqarnissani. Naalakkersuisut kissaatigaat KNR-ip aningaasaqarneranut tunngatillugu siunissaq ungasinnerusoq eqqarsaatigalugu aaqqiissuteqartoqassasoq. Taamaammat Naalakkersuisut aningaasanut inatsisissap pingajussaanneqarnissaanut allannguutissatut siunnersuummik saqqummiipput, KNR-ip aningaasanik tiguisinnaanerata 2010-mi 17 mio. koruuninut aalajangersarneqarnissaa pillugu. Taamaaliornikkut KNR periarfissaqalissaaq 2010-mi pisussaaffimmi

suliarisarnissaannut. Tamatumunnga peqatigitillugu Naalakkersuisut periarfissaqalissapput tusagassiuutit siunissaannut politikkiornissaminnut taassuma siunissamut sammisitamik tunngavissaanik ilaatigut aalajangersaallutik.

KNR-ip Namminersorlutik Oqartussanut atasuunera pillugu Naalakkersuisut inatsisilerituunik allakkiortitsipput. Taanna kingusinnerusukkut Kukkunersuinermit Ataatsimiititaliamut ilisimatitsissutitut nassiunneqassaaq.

Ataatsimiititaliap Naalakkersuisunut ilisileriffigeqquaa nipilersortartunut ineriartortitsinerup nutarterinerullu aamma nuutiniq saqqummersitsisarfinnut tapiissutit akornanni qanoq toqqaannartumik ataqatigiittoqarnersoq, taamatullu tapiissutit taamaallaat Kalaallit Nunaanni atuunnersut. Kiisalu Kukkunersuinermit Ataatsimiititaliap paaserusuppaa tapiissutisisut naatsorsuutiniq nassiussaqaartarnersut atuinermit uppernarsaatissat ilaattut.

Oqaatigineqassaaq tapiissutit taamaallaat Kalaallit Nunaanni saqqummersitsisarfinnut atuummata. Naalakkersuisut naliliipput taamatut tapiissuteqartarnikkut nipilersortartut nunatsinni tamaneersut iluaquserneqarsinnaassasut, tassa allaffissornikkut pisariitsumik tapiissuteqartarnikkut.

Taamaammat allatut tapiissuteqariaatsimik ineriartortitsinissaq sulissutigineqarsimannngilaq. CD-mut immiussisinnaaneq inunnullu amerlanerusunut anngussinnaaneq nipilersortartut nipilersoriaatsiminnik ineriartortitsinissaannut kajumissaataapput. Nipilersoriaatsiminnik samminnillutik sulisarnissaannut tamanna annertunerusumik piumasaaqatitaqalersitsivoq. Oqaatigineqassaaq tapiissutisisut naatsorsuutiminnik nassiussaqaartannngimmata, kisiannili aningaasat akilerneqareersimanerannik akiligassat allagartaat akiliisimanermullu uppernarsaatit utertitsivigineqarnissamik qinnuteqaammut ilanngunneqarsimassapput. Uppernarsaatissat tamakku tiguneqareersinnagit tapiissutiniq akiliuteqartoqarsinnaannngilaq.

Pisortat ingerlatsiveqarfianik kukkunersuineq

Aningaasaqarnermut Ataatsimiititaliap Kultureqarnermut, Ilinniartitaanermit, Ilisimatusarnermit Ilageeqarnermullu Naalakkersuisoqarfimmik pisortat ingerlatsiviattut kukkunersuinerup aallartinneqarnissaanik kissaatigisaa Kukkunersuinermit Ataatsimiititaliap misissuataarpaa.

Kukkunersuinermit Ataatsimiititaliap Naalakkersuisunut nassuiaqquaa Aningaasaqarnermit Ataatsimiititaliamit taamatullu Kukkunersuinermit Ataatsimiititaliamit saaffiginnissutigineqarnerat tamakkununnga tunngasut sammineqarnerulernerannut pissutaasimanersut aamma taakku qanoq sunnuteqarsimanersut.

Sorlu Kukkunersuinermit Ataatsimiititaliap oqaatigigaa efterskolit pillugit suliamik pissuteqartumik Naalakkersuisut isummernissaannut tunngavissiamut tunngatillugu allaffissornikkut sukaterisoqarnissaa pisariaqartinneqarsimavoq. Taamaammat Naalakkersuisut allaffissornermi ataqatigiissaarisussanik pilersitsipput naalakkersuisoqarfinnit

tamanit ilaasortaligaasumik, taakku isummernissamut tunngavissiat tamarmik pitsaassusissaannik qulakkeerinnittassallutik sioqqutsisumillu akuersissuteqartassallutik, taakku Naalakkersuisunut ingerlateqqillugit nassiunneqalinnginnerini.

Naalakkersuisut taamatuttaaq misissuinerni oqaatigineqartuni inerniliinerit innersuussutigissavaat. Ataatsimiititaliap kissaatigisaatut misissuisimanerit pillugit nassuiaat tamatuminngalu malinnaasimanerit pillugit nassuiaat Naalakkersuisunit 2010-mi upernaakkut katersuunnissaq sioqqullugu nassiunneqassapput.

Naalagaaffiup kukkunersiuisartui arlaannaannulluunniit atanngitsut

Kukkunersiuinermut Ataatsimiititaliaq kukkunersiuisarfimmik arlaannaannulluunniit atanngitsumik pilersitsisoqarnissaanik eqqarsaatiminik ilisimatitsissuteqarpoq. Naalakkersuisut Kukkunersiuinermut Ataatsimiititaliap aalajangiivinnissaa qilanaaraat tassungalu atatillugu maluginiarlugu ataatsimiititaliap isumaliutissiissummini pingaartilluinnaraa Kalaallit Nunaannut naleqqussakkamik ilusiliiniartoqarnissaa. Nutaamik ilusiliisoqassappat taanna Nunap Karsiata aningaasaqarnikkut piginnaasaanut naleqqussarneqartussaassaaq, puigorneqassananilu suliassat suliarinissaannut pisariaqartinneqartutut piginnaasallit sulilersinnissaannut sulisoriinnarnissaannullu periarfissat eqqaamaneqarnissaat.

Kukkunersiuisussamik toqqaaneq

Kukkunersiuinermut Ataatsimiititaliap isumaqatigiittup Inatsisartunut inassutigaa naalagaaffimmit akuerisaallutik kukkunersuisartut ingerlateqatigiiffiat Deloitte Nunap Karsiata 2009-mut naatsorsuutaanik kukkunersiuisussatut toqqassagaat.

Naalakkersuisut inassutigineqartut tusaatissatut tiguaat.

Naatsorsuutit akuersissutigineqarnerat

Kukkunersiuinermut Ataatsimiititaliap isumaqatigiittup Nunap Karsiata 2008-mut Naatsorsuutaasa akuersissutigineqarnissaat pillugu aalajangiiffigisassatut siunnersuut akuerineqassasoq inassutigaa.

Naalakkersuisut inassutigineqartut tusaatissatut tiguaat.